

Minister Michelle Winklaar a compromete di introduci mas proteccion pa e Hende Muher

Celebracion di “Dia Internacional di Hende Muher” bon atendi



ORANJESTAD - Mei mei di un cantidad di hende muher den nos comunidad, Minister pa Asuntonan Economico, Social y Cultura, Sra. Michelle Winklaar a hiba palabra y a duna un splicacion di su ultimo bishita na Ginebra, Suiza durante e seminario di “Comision pa Eliminacion di Discriminacion Contra

Hende Muher” (CEDAW). Ayeratardi e Minister a elabora riba e raport di Aruba cu ela presenta na Nacionnan Uni, den cual ta splica di progreso den cierto areanan y di e metanan cu a wordo logra den cuadro di por mehora e situacion di e hende muher na Aruba. Tambe Minister Michelle Winklaar a splica

e presentenan di e intencion di Gobierno pa traha riba un asercamento mas integra y coordina. Mester bisa cu durante e evento ayeratardi na e seccion “Arubiana” di Biblioteca Nacional situa den Bachstraat, a pone un toke special como cu ta

“Dia Internacional di Hende Muher”. Pa e ocasion aki tabatin actuacion di Wilma Kuiperi (baile), Tica Giel (canto) y Ivan Jansen (Guitara clasico). Studentenan di IPA bou guia di Wilma Kuiperi a deleita esnan presente cu un baile den cual nan a demostra

e amor grandi y duradero di e hende muher di tur nacion, cu nan ta comparti dor di trabou duro y dedicacion. Di e forma artistico/cultural aki a combina un evento informativo riba e ultimo desaroyonan pa cu e situacion di nos hende muhernan na Aruba hunto cu un celebracion pa e dia internacional di tur hende muher.